

封邱縣志

王廣慶題

封邱縣續志敘

先是前令朝城孟公奉

巡撫大中丞檄續修縣志延鄉先生內閣中翰方來李君論譔其書已有就緒而孟公卒於官余承乏其後屢奉

檄催念俗吏塵襟聞見寡淺惟先取舊志窺其梗概然後以續志互證之略加整齊以告成事乃舊志手筆極佳而核矣未嘗無譌詳矣未嘗不漏於余心種種不能無疑者續志悉取而訂正之如分野屬角亢氏房心五星劉光集爲光武征王郎時所過封邱之得名由封翟母墓潘店爲潘仁美故里因舛襲謬昭然如揭至誤讀通鑑黑山餘賊句於山川內附會載一黑山尤足供人一大噱者也雖然封之掌故猶不乏也封父之繁弱見左氏傳封父之

龜見禮記明堂位一爲諸侯之分器一爲天子之鎮寶夫非封土之所產乎而胡從來載筆者之未嘗一及也誠能使余假以優游需之歲月從一二先生長者後博綜羣籍徐相商確成書必更有進於是者惜中翰先生已宦遊京師余又鞅掌簿書未暇語此今止就中翰先生論譔草藁而少增刪潤色之釐爲五卷付之雕鐫冀幸率孟君之業以聊應憲檄而已若云毫髮無遺憾尙俟後之君子

皆

康熙三十六年歲在丁丑二月封邱縣知縣遼海耿紘祚序

封邱縣續志纂修姓氏

賜進士出身口郎內閣誥勅撰文中書舍人李承紱纂修

文林郎封邱縣知縣朝城孟鏐監修

文林郎封邱縣知縣三韓耿紘祚增修

儒學教諭新鄉縣白受采參訂

儒學訓導柘城沈蒞

主簿曾稽婁兆獻校閱

典史青縣龔道遠

凡例

一舊誌已載不重出有須訂正增刪者亦無嫌于疣贅

一諸圖俱依現今規模繕寫與舊略異天文因非專家恐不免誤圖刪

一天文歷引諸誌而以歐陽公唐書爲斷不敢以臆說攙入

一境內原無黑山今正其誤竟刪

一境內古蹟見于諸史者今略增入

一人物增東漢一人餘以前誌未載者續入

開封府封邱縣爲重修省志以昭文治事康熙二十九年六月二十日蒙
巡撫河南等處地方提督軍務兼理河道都察院右副都御史閻 憲票照
得詩書雖缺必取信以師儒典禮不亡幸取徵於文獻故國有史邑有志所
以辨風俗稽戶口崇懿徽示法守也矧豫州居天下之中四方道里所均而
可殘佚不補哉本都院下車以來卽檄取各府州縣志細加繙閱其率略舛
譌十之七八卽欲令各府州縣重爲纂輯恐時絀舉羸故爾中止獨省志爲
八郡一州之綱省志修則綱領備而條目可以徐及但自我

皇朝順治己亥以後歷三十餘年未經續修若再因循則世遠言湮譴乘散
遺老成凋謝尙何從徵信耶乃於五月朔設局嵩陽書院敦聘 先達身任
其事而三十年來一應事蹟必須所屬地方博訪開列以憑考核爲此票仰

封邱縣官吏查照粘單事理親自採訪務在精詳毋得遺漏取駁未便文到除將該縣舊志呈送外餘限十五日內造清冊報送立需付局慎毋遲延速之慎之須票

康熙二十九年六月

日

封邱縣續志目錄

第一卷

圖 止存四幅

沿革

天文

四至

第二卷

建置 凡七條

城池

學校

河防

鄉鎮

公署

橋梁

倉庫

社學

第三卷

山川

古蹟

風俗

土產

塚墓

第四卷

寺觀

賦稅

職官

人物 凡七條

賢哲

科貢

援例

胥掾

方技

孝行

節列

第五卷


藝文

災祥

封邱縣續志第一卷

圖

輿地之書莫不有圖蓋都鄙高下之殊形延袤廣輪之異勢文字所不能盡者假諸繪事以寫其象俾觀者一見而晰不啻身履其境而瞭然在目也稽諸周禮則司徒掌之職方亦掌之要惟求其核而確信而可傳而已矣既不
可遺所有而使之無亦豈可鑿所無而謂之有歟封志舊有九圖非不詳且
備也但封邱地不百里謂爲角亢氏房心五宿之分野其地四面坦平而謂
城北有黑山非訛則誤實滋後人之疑今以漢唐諸史考核刪定雖止存其
四而全封形勢大略可覩已



封邱古封父地見諸春秋傳者曰蟲牢黃池平邱長邱或屬衛或屬鄭皆其
境內地戰國時屬大梁而青陵臺則又宋王所築秦郡縣天下茲地闕無考
班氏志地理封邱之名始見封邱沿革當自漢始

漢武帝元狩元年置兗州陳留郡領縣十七封邱平邱居其二魏晉屬陳留
國廢平邱拓跋魏真君九年併於酸棗景明二年復治封邱後齊廢封邱隋
開皇十六年始復屬東郡唐屬河南道汴州陳留郡繁縣五代及宋屬開封
府金屬開封府上留守司元屬南京路至元二十五年改汴梁路明屬河南
布政使司開封府

皇清因之屬河南布政使司開封府

天文


史記天官書曰角亢氏兗州晉書天文志曰自軫十二度至氏四度爲壽星於辰在辰鄭之分野屬兗州唐書地理志曰鄭汴陳蔡潁爲壽星分封邱於漢晉屬兗於唐屬汴宜爲角亢壽星分野而唐書天文志更明著其文曰角亢壽星也初軫十度餘八十七秒十四少中角八度終氏一度自原武管城濱河濟之南東至陳留封邱夫固明言封邱矣封邱星土屬角亢壽星分野無疑舊云房心參入者非是

四至

周禮夏官形方氏掌制邦國之地域而正其封疆無有華離之地封邱中縣也而幅員偏側殊甚廣不八十里祥符地錯處者幾半袤約四十里去南郭

不數武悉祥符地矣絕補參差實有華離之象犬牙相入者固書不勝書也
今考正疆域惟列其壤地相接者

東至蘭陽縣界四十五里 南至祥符縣界三里至縣六十里 西至延津
縣界三十五里至縣四十里 北至滑縣界三十里至縣一百二十里 東
北至長垣縣界三十五里至縣六十里 東南至祥符縣界十里 西南至
陽武縣界五十里 西北至胙城縣界三十五里至縣八十里



封邱縣續志第二卷

建置

春秋書築者八書城者二十有九或創始或完舊雖時且義亦書見勞民爲重事也然澤門之誓固來興役之詛而渠邱恃陋浹辰而喪其三都是以書稱有備易贊設險苟有關於治理則均人鼙鼓固王政所不廢也要無失乎以佚道使民之意而自巨而細咸歷歷可述焉

城池

封邱城自漢有之

後漢書虞延傳光武東巡還經封邱城門門下小不容羽蓋可徹也

歷代修築無考金大定

中河水湮沒遷治新城元初新城又爲河水所壞乃因故城遺址稍加完葺

而遷治焉

見元史

至正間又淪於水故明洪武元年再建土城成化二年知縣

王輔重修宏治二年復爲河圯十三年知縣袁仕增修始築護城堤正德六年知縣張守立五門樓城圍五里二十四步高二丈七尺廣一丈四尺池深九尺闊一丈三尺隆慶六年知縣李呈明始用磚石包修高三丈廣一丈九尺萬歷三年知縣胡以祚置五門吊橋三十六年知縣趙浩重修四十年知縣張鯉新東北門樓及橋四十三年知縣王策重修東門外橋

皇清順治九年河決城毀土壘幾盡居民蕩析官寄於鄉至十八年知縣屠粹忠始復治城中依其規模設法修築然高僅踰丈廣不及尋四門雖具村中柵耳康熙三十年知縣孟鏐重修四門建修城樓而城垣傾頽庫薄愈甚今知縣耿紘祚方以運柳羨金散窖陶磚有增高培薄之舉未知願力得繼與否而未雨綢繆誠不可緩也